

Contradeciendo algun ponencia

Dr. Jaime Falconi por solicita di nobo p'e funcion di Director Medico di HOH

Despues cu diabierna e empleadonan di Dr. Horacio E. Oduber Hospital a pone trabou abou pa demostra nan disgusto cu e decision di Hunta di Supervision pa no prolonga e contract cu dr. Jaime Falconi tabatin, awor Minister dr. Alex Schwengle lo cuminsa cu e formacion di un Hunta di Supervision nobo. Diabierna marduga e hunta e keda absolvi y awor mester bay delibera con ta

forma un hunta nobo. Unabes e hunta nobo keda forma, lo bay dicidi riba ken lo bay yena e posicion di Director Medico. Te cu e momento ey e maneho diario di hospital lo ta den man di e Director Financiero Teo de Kool y un management team. E siman aki Minister Schwengle lo reuni cu dos kroonlid potencial y despues e kroonleden lo por escoge e 5 miembronan di Hunta di Supervision nobo. En-

tretanto hospital lo keda sin un Director Medico, ya cu mientras cu no tin hunta no por nombra un director. Di otro banda mester bisa cu diabierna por a scucha un lider di sindicato ABV, Gina Maduro hopi sigur cu dr. Jaime Falconi lo keda como Director Medico.

Segun ABV, nan ta sigur cu dr. Falconi lo keda, ya cu e partidonan tin un gentlemen's agreement pa atene nan mes na

dje. E motibo pakico dr. Falconi no a acepta e contract di 4 luna cu Hunta di Supervision a presenta, ta pasobra cu lo tabatin cierto clausula cu ta bisa cu unabes e 4 luna pasa, no ta permiti mas pa dr. Jaime Falconi solicita p'e funcion di Director Medico. Segun Minister dr. Schwengle, no ta berdad cu dr. Falconi lo no ta permiti mas pa solicita p'e funcion di Director Medico. Tampoco lo ta berdad cu e por

keda Director Medico a base di e gentlemen's agreement di januari. Segun e mandatario, e nombramento di un Director Medico lo ta responsabilidad di Hunta di Supervision nobo. E ta duna nan tur espacio pa por haci nan trabou. E hunta lo haci un inventarisacion di tur loke hospital mester y a base di esaki lo traha e profile p'e Director Medico nobo. Henter proceso aki lo ta uno transparente.